

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN LIEW CHIN TONG [ KLUANG ]**

**TARIKH : 19 JUN 2014**

**RUJUKAN : 6927**

**SOALAN:**

**Tuan Liew Chin Tong [ Kluang ]** minta **MENTERI DALAM NEGERI** menyatakan adakah Kerajaan bercadang menggantikan Cawangan Khas PDRM dengan Organisasi Perisikan Keselamatan dan Jenayah seperti di Australia, di mana organisasi tersebut menerima pengawasan Parlimen dan dikawal selia oleh undang-undang yang jelas.

## **JAWAPAN:**

**Tuan Yang di-Pertua,**

**Tugas dan tanggungjawab utama Cawangan Khas seperti termaktub dalam Seksyen 3 (3) Akta Polis 1967 (Mengumpul Maklumat Risikan) dan dalam Piagam Cawangan Khas. Tugas utama adalah menjalankan serta mengumpul risikan Keselamatan Negara sama ada ancaman daripada luar atau dalam negara oleh mana-mana organisasi atau individu yang boleh memudaratkan keselamatan dan kedaulatan negara. Di samping itu pihak Cawangan Khas juga membantu Jabatan Siasatan Jenayah dalam mendapatkan maklumat berkaitan kegiatan jenayah.**

**Keupayaan mengekalkan keamanan dan keselamatan negara sepanjang penubuhan Jabatan Cawangan Khas perlu diiktiraf ekoran kejayaannya mengumpul risikan keselamatan, sebagai contoh kejayaan menamatkan perjuangan pengganas komunis sehingga menyerah diri pada tahun 1989 dan kejayaan mengharamkan gerakan agama Al Arqam pada tahun 1994. Justeru, cadangan untuk memansuhkan Jabatan ini adalah tidak munasabah dan mampu mendedahkan kedaulatan negara terhadap ancaman dari dalam dan luar negara.**

**Cawangan Khas banyak berperanan dan membantu mengatasi pelbagai ancaman musuh samada dalam dan luar negara, terutama hasil dari perisikan yang dijalankan. Kejayaan tersebut telah mendapat pengiktirafan dari banyak negara. Dalam situasi terkini mereka juga turut membantu menjalankan risikan jenayah.**

**Kerajaan tidak bercadang menggantikan Cawangan Khas dengan Organisasi Perisikan Keselamatan dan Jenayah seperti di Australia seperti yang dicadangkan memandangkan fungsi dan peranan yang dijalankan oleh Cawangan Khas adalah jelas dan telah terbukti keberkesanannya.**

**Dalam menentukan kedaulatan dan corak pemerintahan negara, kita mempunyai acuan sendiri dan tidak semua perkara harus mengikuti apa yang dibuat oleh negara asing memandangkan negara kita mempunyai keunikan yang tersendiri.**